

Набий алайҳиссаломнинг қайтариқлари (ўнинчи мақола)



11:00 / 11.11.2020 2201

Ҳайвонларга зулмдан қайтариқлар

Абдуллоҳ розияллоҳу анҳу бундай дейдилар:

«Бир маҳал мен бир илонни ўлдирмоқчи бўлиб таъқиб этаётган эдим. Абу Лубоба менга: «Уни ўлдирма», деб қичқирди. Мен «Ахир Расулуллоҳ соллаллоҳу алайҳи васаллам илонларни ўлдирмоққа амр қилганлар-ку», дедим. У: «Шундан кейин у зот хонаки (оқ) илонларни ўлдирмоқдан қайтарганлар, улар уйларда яшовчи жинлардир», деди».

Имом Бухорий ривоятлари.

Ҳишом ибн Зайд ривоят қиладилар:

«Мен Анас билан бирга Ҳакам ибн Айюбнинг ҳузурига кирдим. Анас бир гуруҳ болаларнинг бир товуқни боғлаб қўйиб тошбўрон қилаётганларини кўриб: «Расулуллоҳ соллаллоҳу алайҳи васаллам жониворларни ушлаб олиб (қийнамоқдан) қайтарганлар», дедилар».

Имом Бухорий ривоятлари.

Абдуллоҳ ибн Язид ривоят қиладилар:

«Расулуллоҳ соллаллоҳу алайҳи васаллам бировнинг молини ўғирламоқдан (тортиб олмоқдан) ҳамда жониворларга азоб бермоқдан қайтарганлар».

Имом Бухорий ривоятлари.

Абдуллоҳ ибн Умар розияллоҳу анҳу молнинг юзига белги қўймоқликни рад этиб: «Жаноб Расулуллоҳ молнинг юзига тамға босмоқдан қайтарганлар», дедилар.

Имом Бухорий ривоятлари.

Жобир ибн Абдуллоҳ розияллоҳу анҳудан ривоят қилинади:

«Расулуллоҳ соллаллоҳу алайҳи васаллам махлуқлар юзига тамға босишдан ва юзига урмоқдан қайтардилар».

Имом Бухорий ривоятлари.

Абдуллоҳ ибн Аббос розияллоҳу анҳудан ривоят қилинади:

«Расулуллоҳ соллаллоҳу алайҳи васаллам жониворларни (ҳайвон ва қушларни) нишон қилиб ўқ отишдан қайтарганлар».

Имом Термизий ривоятлари.

Абдуллоҳ ибн Аббос розияллоҳу анҳудан ривоят қилинади:

«Расулуллоҳ соллаллоҳу алайҳи васаллам ҳайвонларни бир-бири билан уриштиришдан қайтардилар».

Имом Термизий ривоятлари.

Абдул Малиҳ отасидан шундай ривоят қилади:

«Расулуллоҳ соллаллоҳу алайҳи васаллам йиртқич ҳайвонлар терисини ерга тўшашдан ва уни истеъмол қилишдан (ишлатишдан) қайтардилар».

Имом Термизий ривоятлари.

Абдуллоҳ ибн Умар розияллоҳу анҳудан ривоят қилинади:

«Набий соллаллоҳу алайҳи васаллам эркак ҳайвонни (урғочи ҳайвонни қочириб олиш учун) ижарага бериб ҳақ олишдан қайтардилар».

Имом Бухорий ривоятлари.

Абдуллоҳ ибн Умар розияллоҳу анҳудан ривоят қилинади:

«Расулуллоҳ соллаллоҳу алайҳи васаллам шундай дедилар: «Ҳеч ким бировнинг соғин ҳайвонини эгасининг рухсатисиз соғмасин! Биронтангиз ичимлик манбаингиз бировнинг қўлига ўтмоғини, (яъни) хазинангиз (эшиги) синдирилиб, бойлигингиз олиб кетилмоғини истайсизми? Дарҳақиқат, одамларнинг соғин ҳайвонлари елини улар учун ризқ-рўз манбаидир. Шу боис ҳеч ким бировнинг соғин ҳайвонини эгасининг рухсатисиз соғмасин!».

Имом Бухорий ривоятлари.

(Тамом)

[Тўққизинчи мақола](#)

Islom.uz архивидан